



## Sakina dekh rahi hai

Ghire hai laakho(n) mein kaise, hussain bekaso tanha, sakina dekh rahi hai

Dare khayam se ran mein, ulat ke khayme ka parda, sakina dekh rahi hai

1. Wo zibha hote huwe baap ko na dekh sake  
Meri sakina hai masoom ye khayaal rahe  
Sitam ye uspe na dhaana abhi churi na chalana, sakina dekh rahi hai
2. Badan hai teero(n) se chalni hai zakhm zakhm hussain  
Bapaa hai khayma-e sarwar mein ek shoro shayn  
Kabhi laeen ka khanjar kabhi wo pyaasa gala, sakina dekh rahi hai
3. Gira hai aag ke sholo mein khayma-e sarwar  
Haram hussain ke rote hai lut gayi chaadar  
Kabhi phuphi ka khula sar kabhi hussain ka khayma, sakina dekh rahi hai
4. Badan ke zakhmo(n) ka marham kahi nahi milta  
Adoo hussain ko dete hai kis qadar iza  
Jise batool ne pala sar uska barsare neza, sakina dekh rahi hai
5. Tumhaare laashaa-e be sar ko du(n) kafan kaise  
Mujhe bataao zara tum batool ke bete  
Hai bekasi ka natija padha hai ret pe laasha, sakina dekh rahi hai
6. Koi yatimo pe aisa sitam nahi karta  
Bas ek baar mera haal dekhlo baba  
Suno ay shahe zamana kisi ne jo nahi dekha, sakina dekh rahi hai
7. Bayaan karti thi binte hussain ibne ali  
Tumhaare baad musibat ki intehaa dekhi  
Tumhaare baad ye ghurki, tumhaare baad tamacha, sakina dekh rahi hai



I M R A N D A T O O

8. Na khench ghurbate shabbir ka koi manzar  
Sadaa-e ghayb ye aati hai ajaae qaisar  
Nahi hai zabt ka yaara qalam ko rok khudara, sakina dekh rahi hai